

Headlines

- 1 प्रधानमंत्री नरेंद्र मोदी होंरें 1975 आहली इमरजेंसी दा विरोध करने आहले महान लोकें गी श्रद्धांजलि भेंट कीती।
- 2 जम्मू थमां श्री माता वैष्णो देवी दे पवित्र तीर्थ स्थल जाने आस्तै अज्जै थमां सिद्दी हैलीकाप्टर दी सेवा शुरू होई गई ऐ।
- 3 लेफ्टिनेंट गवर्नर मनोज सिन्हा होंरें श्री अमरनाथ यात्रा लेई कीते गेदे सुरक्षा इंतजामें दा जायजा लैने आस्तै बालटाल आहले आधार शिविर दा दौरा लाया।
- 4 औंदी सालाना श्री अमरनाथ जात्तरा थमां पैहले जम्मू दे भगवती नगर आधार शिविर कैंप च सुरक्षा दे त्रै सतह आहले प्रबंध कीते गे न।

<><><><><><>

PM-Emergency

प्रधानमंत्री नरेंद्र मोदी होंरें 1975 आली इमरजेंसी दा विरोध करने आहले महान लोकें गी श्रद्धांजलि भेंट कीती। इक सोशल मीडिया पोस्ट च मोदी होंरें आखेआ जे एहू दिन चेत्ता दोआंदा ऐ जे कियां कांग्रेस पार्टी नै बुनियादी आजादी गी नष्ट करी दित्ता ते भारत दे संविधान गी जिसदा हर भारती बड़ा सम्मान करदा ऐ, उसी मिंदिए रक्खी दित्ता। उनें आखेआ जे उसलै दी कांग्रेस सरकार नै सब्बनं लोकतांत्रिक सिद्धांतें दी पिच्छड़े रक्खी दित्ता ते मुख्य गी जेल बनाई दित्ता। मोदी होंरें आखेआ जे जिनें लोकें इमरजेंसी लाई, उनेंगी संविधान प्रति प्यार जताने दा कोई अधिकार नेई। उनें आखेआ जे एहू उये लोक न जिनें केई सारे मौकें पर दफा 356 लाई। प्रेस दी आजादी गी नष्ट करने आस्तै विधेयक आंदे। संघवाद गी नष्ट कीता ते संविधान दे हर पैहलु दा उल्लंघन कीता। प्रधानमंत्री होंरें आरोप लाया जे जिस मानसिकता करी आपातकाल लाया गेआ ओहू मानसिकता उस पार्टी दी अज्ज बी जिंदा ऐ।

<><><><><><>

Nadda-Emergency

केंद्री मंत्री ते भाजपा अध्यक्ष जगत प्रकाश नड्डा होंरें कांग्रेस पर निशाना लांदे होई आखेआ जे कांग्रेस दी सोच ाय ओदे कम्म करने दे तरीके च लोकतंत्र लेई कोई थाहर नेई ऐ। भाजपा अध्यक्ष 1975 च लाई गेदी इमरजेंसी बारै बोलदे होई नड्डा होंरें आखेआ जे इस चीज नै मुख्य दे लोकतंत्र दे हर थम्म गी हिलाइये रक्खी दित्ता। उनें आखेआ जे कांग्रेस नै डॉ. बी.आर अम्बेडकर हुंदे आस्सेआ दित्ते गेदे संविधान दा गला घोटने दी कोशिश कीती। अपने इक सोशल मीडिया पोस्ट च नड्डा होंरें आखेआ जे अज्ज जेडे भारत दे संविधान दे रक्षक होने दा दावा करा'रदे न, उनें संवैधानिक मुल्लें दी राक्खी लेई अपनी आवाज चुक्कने आलें गी दवाने च कोई कसर बाकी नेई छोड़ी।

<><><><><><>

Helicopter-Jammu

श्री माता वैष्णो देवी दी पवित्र गुफा च दर्शन गित्तै जाने आस्तै जम्मू थमां सिद्दी हैलीकाप्टर सेवा शुरू होई गई ऐ जेहदा सब्बनं गी बड़ी बेसब्री कन्नै इंतजार हा। श्राइन बोर्ड नै श्रद्धालुएं आस्तै दऊं पैकेज जारी कीते गए न जेदे च इक्कै दिन च वापस औने आहलें आस्तै 35 ज्हार प्रति यात्रु ते दुए दिन वापस औने आहलें आस्तै 60 ज्हार रपें प्रति तीर्थ यात्री होग। स्हाड़े जिला संवाददाता दविंद्र ठाकुर कन्नै गल्ल करदे होई श्री माता वैष्णो देवी श्राइन बोर्ड दे सीईओ अंशुल गर्ग ते इक श्रद्धालु नै हैलीकाप्टर सेवा बारै गलाया।

<><><><><><>

Joshi-ISO Meet

उपभोक्ता मामले, खुराक ते सार्वजनिक बंड सरबंधी केंद्री मंत्री प्रहलाद जोशी होंरें गन्ने दे टिकाऊ ते विधि उत्पादन आस्तै वैश्विक सहयोग दा आह्वान कीता। दिल्ली च 64मीं अंतरराष्ट्रीय गन्ना संगठन-आईएसओ परिषद दी बैठक दौरान इक

कार्यशाला गी संबोधित करदे होई जोशी होरें आखेआ जे कुसै योजना दी अमलावरी करदे होई उपभोक्ता, करसानें ते उद्योग दे हितें च संतुलन कायम करना जरूरी ऐ। उनें कार्यशाला दे सदस्यें गी इक जुट होने दा आग्रहन कीता। उनें घट्ट पानी दे इस्तेमाल ते बद्दोबद्द इस्तेमाल होने आली फसलें दे उत्पादन करने दा आग्रह कीता। मीडिया कन्नै गल्ल करदे होई जोशी होरें मेद जाहिर कीती जे भारत अंतरराष्ट्रीय गन्ना संगठन दी बैठक दी मेजबानी 12 बरे मगरा करा रदा ऐ। इस बैठक च करसानें दे कल्याण उपभोक्ता कल्याण ते पानी दे संरक्षण पर विचारें दा आदान-प्रदान कीता जाग।

<><><><><><>

### LS-Speaker

भारतीय जनता पार्टी दे वरिष्ठ सांसद ओम बिरला पिछली लोकसभा बी अध्यक्ष हे ते इस बारी बी राष्ट्रीय जनतांत्रिक गठबंधन एनडीए नै अध्यक्ष दे ओहदे लेई उनेंगी अपना मेदवार बनाया ऐ। तोआई विपक्ष दे इंडी गठबंधन नै इस ओहदे लेई कांग्रेस दे सांसद के. सुरेश होरें गी अपना मेदवार बनाया ऐ। दौनें मेदवारें अध्यक्ष दे ओहदे आस्तै अपना-अपना नामांकन भरेआ। अध्यक्ष दा चुनां कल होग। एहदे थवां पैहले सरकार ते विपक्ष इस ओहदे आस्तै आम सहमति तगर पुज्जने च असफल राए हे। संसद दे बाहरें मीडिया कन्नै गल्लबात च केंद्री मंत्री पीयूष गोयल होरें आखेआ जे वरिष्ठ केंद्री मंत्री राजनाथ सिंह, अमित शाह ते जगत प्रकाश नड्डा होरें इस मुद्दे पर कांग्रेस नेता के.सी वेणुगोपाल ते डीएमके दे नेता टी.आर बालू हुंदे कन्नै बैठक कीती। विपक्ष दे नेता बिरला हुंदी मदवारी पर समर्थन देने थवां पैहले उपाध्यक्ष दे नां दी घोषणा करने पर जोर देआ रदे हे। गोयल होरें आखेआ जे उनेंगी सूचित करी दित्ता गेआ ऐ जे उपाध्यक्ष दा मुद्दा एहदे चुनां दे बेल्ले नबेडेया जाग। उनें आखेआ जे विपक्ष शर्ता रक्खा'रदा ऐ जे जिसी सरकार खारिज करी चुकी दी ऐ। एहदे थवां पैहले कांग्रेस दे सांसद राहुल गांधी होरें आखेआ जे विपक्ष अध्यक्ष दे मेदवार गी अपना समर्थन देने आस्तै त्यार ऐ पर उपाध्या ओहदे पर विपक्षी पार्टी दा मेदवार होना लोडचदा। संसद परिसर च मीडिया गी जानकारी दिंदे होई गांधी होरें आखेआ जे राजनाथ सिंह होरें मल्लिकार्जुन खड्गे हुंदे कन्नै मलाटी करिए उनेंगी अध्यक्ष गी अपना समर्थन देने लेई गलाया। गांधी होरें आखेआ जे खड्गे होरें दस्सेया जे विपक्ष एनडीए दे अध्यक्ष दे मेदवार गी अपना समर्थन देने लेई प्यार ऐ पर रिवायत मुजब उपाध्यक्ष दा ओहदा विपक्ष दा होना लोडचदा।

<><><><><><>

### FM-Pre Budget Meet

वित्त मंत्री निर्मला सीतारमण होरें औंदे आम बजट दा सुझा लैने लेई नमीं दिल्ली च बपार ते सेवा क्षेत्र दे प्रतिनिधिएं कन्नै 7मीं बजट थवां पैहले आली बैठक दी अध्यक्षता कीती। बजट थवां पैहले आली विचार-विमर्श सरबन्धी बैठक च केंद्री वित्त राज्यमंत्री पंकज चौधरी, मुख्क आर्थिक सलाहकार वी. अनंत नागेश्वरन, वित्त सचिव टी.बी सोमनाथन ते होर दुए अधिकारी मौजूद हे। कल खजाना मंत्री होरें बपार ते मजदूर संगठनें दे प्रतिनिधिएं कन्नै बजट थवां पैहले आहली बैठक लाई। पिछले हफते वित्त मंत्री होरें सब्बनें राज्यें ते केंद्र शासित प्रदेशें दे वित्त मंत्रिएं कन्नै बजट थवां पैहले आहली बैठक कीती ही। उनें करसान संगठनें ते राईबाई सरबन्धी अर्थ शास्त्रिएं दे प्रतिनिधिएं कन्नै बी गल्लबात कीती।

<><><><><><>

### LG-Yatra

लेफ्टिनेंट गवर्नर मनोज सिन्हा होरें अज्ज गांदरबल जिले च श्री अमरनाथ जात्तरा दे बालटाल बेस कैंप दा दौरा लाया। अपने दौरे दौरान मनोज सिन्हा होरें सुरक्षा दे इंतजामें, दवाइयें, आक्सीजन, पानी, साफ-सफाई ते श्रद्धालुएं दे कैंप तगर पुज्जने आहले सब्बनें रूटें दा जायजा लैता। इस बरे दी श्री अमरनाथ जात्तरा 29 जून थमां शुरू होआ करदी ऐ ते 19 अगस्त 2024 गी सम्पन्न होई जाग। एहदे मगरा लेफ्टिनेंट गवर्नर होरें सोनामर्ग च जम्मू-कश्मीर भारत स्काउट्स एंड गाइड्स दे कैंप दा दौरा लाया। जम्मू-कश्मीर भारत स्काउट्स एंड गाइड्स गी संबोधित करदे होई उनें आखेआ जे स्हाडे स्काउट्स एंड गाइड्स अपनी सेवा, अनुशासत ते समर्पण दे प्रतीक न। लेफ्टिनेंट गवर्नर होरें सब्बनें स्काउट्स एंड गाइड्स गी अपील कीती ऐ जे ओह सुखने दिक्खने आस्तै नमें लक्ष्य तैय करन ते उनें सुखनें गी पूरा करन। उनें आखेआ ऐ जे तुस गै भविक्ख च केंद्र शासित प्रदेश दी तरक्की दे सफर गी अगगे लेइये जाडन।

<><><><><><>

### Yatra-Security

29 जून थमां शुरू होने आहली श्री अमरनाथ यात्रा लेई जम्मू दे भगवती नगर च सब्बै त्यारियां करी लैती गेदियां न। सुरक्षा सरबन्धी इंतजामें बारै गल्ल करदे होई जम्मू दे एसएसपी विनोद कुमार होरें आखेआ ऐ जे सुरक्षा दे सब्बै लोडचदे इंतजाम करी लैते गेदे न ते सब्बनें सुरक्षा एजेंसिं गी थाहरें-थाहरें पर तैनात कीता गेदा ऐ। उनें आखेआ।

<><><><><><>

### SANJY-24-Visits

ग्रामीण विकास मैहकमे दे पंचायती राज दे सचिव डॉ. शाहिद इकबाल चौधरी होरें कल बालटाल दा व्यापक दौरा लाया ते श्री अमरनाथ जात्तरा 2024 आस्तै कीते गेदे इंतजामें दा जायजा लैता। इस मौके पर डॉक्टर शाहिद इकबाल होरें बालटाल च बिजली ते पानी सप्लाई, टैंट लाने, सब्बनें लोकें आस्तै जरूरतै आहले समेयान समेत साफ-सफाई जनेहू सब्बनें लोडचदे इंतजामें दी समीक्षा कीती। इंतजामें दी समीक्षा करदे होई उनें सब्बनें सरबंधत मैहकमें गी निर्देश दित्ते न जे ओहू श्रद्धालुएं दी सुविधा आस्तै सब्बै इंतजाम करन। इस मौके पर डॉक्टर शाहिद होरें सिविल प्रशासन ते कैंप दे डरैक्टरें कन्नै यात्रा गी बवस्था आहले ढंगै सिर करोआने लेई इंतजामें दा जायजा लैने आस्तै इक बैठक दी अध्यक्षता कीती। डॉ. शाहिद इकबाल होरें इस गल्ला पर जोर भरेआ ऐ जे श्रद्धालुएं गी साफ-सुथरा माहौल उपलब्ध करोआने आस्तै चेचा ध्यान दित्ता जा।

<><><><><><>

### IGP-Yatra

कश्मीर जोन दे आईजीपी वी.के बिरदी होरें कल कश्मीर दे पुलस कंट्रोल रूम च श्री अमरनाथ जात्तरा 2024 गी सुचारू ते बवस्था आहले ढंगै सिर करोआने लेई लोडचदे इंतजामें दा जायजा लैता। इस मौके पर हिस्सा लैने आहले अफसरें पावर प्वाइंट प्रेजेंटेशन राहें आईजीपी होरें गी सुरक्षा दे इंतजामें बारै जानकारी दित्ती। आईजीपी होरें सब्बनें सरबंधत अफसरें गी हिदायतां जारी कीतियां जे ओहू जात्तरा गी सुचारू ढंगै सिर करोआने लेई आपसी तालमेल बनाइये कम्म करन।

<><><><><><>

### Committee-NTA Meeting

राष्ट्रीय परीक्षा एजेंसी एनटीए राएं म्तेहानें गी आजाद निर्पक्व ते सुचारू करोआने लेई शिक्षा मंत्रालय आस्सेआ कायम माहिरें दी उच्च स्तरीय समिति दी बैठक होई। मीडिया कन्नै गल्ल करदे होई कमेटी दे अध्यक्ष डॉ. के. राधा कृष्णन होरें आखेआ जे समिति दी प्राथमिकता छात्रें ते सुझाएं गी जानना ऐ। एहदे आस्तै उंदे कन्नै गल्लबात कीती जाग। सरकार नै इसरो दे साबका अध्यक्ष डॉ. के. राधा कृष्णन हुंदी अध्यक्षता च माहिरें दी 7 सदस्यीय समिति दा गठन कीता ऐ। समिति मौजूदा प्रक्रियाएं दा मुल्याकन, सुधार दे सुझा ते एनटीए च साफ ते स्पष्ट भूमिकाएं ते जिम्मेदारिएं गी परिभाषित करोग।

<><><><><><>

### DC. Jammu- Migrants

जम्मू दे डिप्टी कमिशनर सचिन कुमार वैश्य होरें कश्मीरी विस्थापितें गी समाज कल्याण दे फायदे उपलब्ध करोआने आस्जतै इक महत्वपूर्ण गैं पुट्टदे होई इक बैठक लाई। बैठक च बाबातकारी मैहकमें दे आयुक्त रिविंद करवानी होरें बी हिस्सा लैता। उनें कश्मीरी विस्थापितें लेई राशन कार्डें दी बंड सरबंधी पैहलकदमी दी समीक्षा पर जोर भरेआ। इस पैहलकदमी दा मकसद कश्मीरी विस्थापितें गी राष्ट्रीय खाद्य सुरक्षा कनून तैहत समाज कल्याण दे फायदें गी उंदे तगर पजाया जा। इस दौरान एह फैसला लैता गेआ ऐ जे इस कम्मै लेई खास कैंपें दा आयोजन जाग।

<><><><><><>